

# Was mache mer jetzt?

Ländliche Komödie in drei Akten von This Vetsch

<b>Personen</b> (ca. Einsätze)	4 H / 5 D	ca. 110 Min.
Lukas Gwerder (94)	Schattenhofbauer	
Vreni Gwerder (101)	seine Tochter	
Gret Käser (50)	Nachbarin von Gwerder's	
David Käser (85)	Sohn von Gret	
Lea Gregoli (74)	Feriengast	
Berta (124)	Schwester von Lukas	
Babett (94)	Schwester von Lukas	
Gigax / Mörgeli (61)	undurchsichtige Person	
Lorenz Hasenfuss (96)	Polizist	

Zeit: Gegenwart

**Ort der Handlung:** Zwischen Haus und Stall

## **Das Recht zur Aufführung:**

Es sind mindestens **10** neue Texthefte vom Verlag käuflich zu erwerben. Das Ausleihen oder Abschreiben der Pflichtexemplare ist untersagt und wird nötigenfalls gerichtlich geahndet. (*Gesetz betreffend Urheberrecht*)

Bezahlung einer Aufführungsgebühr für jede Aufführung zugunsten des Autors an den Theaterverlag Breuninger in Aarau, PC 50-3188. Die Aufführungsrechte sind vor den Proben beim Verlag einzuholen.

Vereine, die diese Bestimmungen zu umgehen versuchen, haben die doppelten Aufführungsgebühren zu bezahlen.

Verfasser und Verlag

**Der Verlag ist gerne bereit, die Texthefte (*Regie, etc.*) auf Format A-4 zu vergrössern. Geben Sie bitte bei der Bestellung die Anzahl A-4-Hefte an.**

## **Bühnenbild:**

Links Haus, rechts Stall. Vor dem Haus eine Bank und Tisch mit Stühlen. Am Waldrand einen Brunnen. Einige Versteckmöglichkeiten, z.B. Scheiterhaufen, Bäume, Brunnen oder was gerade möglich ist und zum Bühnenbild passt.

## **Inhaltsangabe:**

Es ist nach jedem Akt ein Tag später.

Auf dem Schattenhof verschwinden plötzlich Kühe. Gleichzeitig tauchen Lukas Gwerder's nicht gerade beliebten Schwestern Berta und Babett auf. Zur gleichen Zeit tummelt sich die etwas zwielichtige Person mit Namen Gigax in der Gegend herum. Die ledige und eher faule Tochter von Lukas, welche den Hof übernehmen sollte, hat nicht unbedingt Interesse daran, weil sie liebend gerne in die Stadt möchte. Da oben findet man ja sowieso keinen Mann, denkt sie? Dass dann auch noch die italienisch sprechende Lea Gregoli auftaucht und der Tochter Vreni noch die letzte Hoffnung mit dem Nachbarssohn, David Käser nimmt, macht die Sache noch komplizierter. Es gibt zwei Personen in diesem Stück, welche sich ungeahnt als zwei andere Figuren entpuppen. Lea als Gabi und aus Gigax wird Herr Mögeli. Dass der ohnehin schon unsichere Polizist, Lorenz Hasenfuss, der stets mit dem Spruch „was mache mir jetzt“ aufwartet, durcheinander gerät ist zu erwarten. Warum und mit welchem Hintergrund lesen sie am besten selbst! Alles in allem eine heitere Komödie mit vielen Verwirrungen und Pointen, schwungvoll und humoristisch, mit äusserst schalkhaften Wendungen verwinkelt, welche dem Stück zu Spannung bis am Schluss verhelfen.

# 1. Akt

## 1. Szene:

Gigax, Vreni, Lukas

Es ist in den frühen Morgenstunden. Der Schattenhof ist ein abgelegener, eher alter, am Waldrand gelegener Bauernhof. Auf der Bühne ist es noch dunkel.

**Gigax:** *(kommt von hinten links, trägt grossen Mantel und ist bis zur Unkenntlichkeit ver mummt. Sucht etwas vor dem Haus und dem Stall und macht dabei ungewollten Lärm, indem ein Gegenstand umfällt. Dazu eventuell Hundegebell. Darauf verschwindet er unverrichteter Dinge nach hinten rechts)*

*(anschliessend ist es ca. eine Minute ruhig auf der Bühne. Vogelgezwitscher ist zu hören. Das Licht geht langsam an und ein neuer Tag bricht an)*

**Vreni:** *(ist faul und bekannt als Tagträumerin. Ihre Bewegungen, wie auch ihre Redensart sind sehr langsam. Sie kommt gähnend, mit zerzauster Frisur und nur mit Nachthemd bekleidet aus dem Haus von links. In der Hand hat sie eine Taschenlampe und zündet zuerst ins Publikum) Hallo, isch do öpper? (dann aber zur Sache) Hallooo... (spricht für sich) Was isch denn das für es Grüsch gsi wo mich geweckt hett? Aa, do liit jo en Chessel am Bode! (oder nennt den Gegenstand der halt gerade heruntergefallen ist und hebt diesen auf und stellt ihn wieder an seinen Platz) Das isch sicher e Chatz gsi... oder de blöd Fuchs! (sucht weiter nach Spuren und bewegt sich nach hinten rechts. Plötzlich ertönt ein erstickender Schrei von Vreni. Dann ist wieder Ruhe)*

**Lukas:** *(schaut aus dem Fenster von links und hört gerade noch den Schrei von Vreni. Lukas ist ein eher ängstlicher Mann und ist ebenfalls halb angezogen) Wär isch do? Hallo isch do öpper? Nüüt! Ha mi ächt girrt? (verschwindet wieder, kommt nach kurzer Pause aus dem Haus und hat ein Gewehr in der Hand) Was isch denn jetzt das gsi? Hallo, wär isch do? (schaut sich um) Do schiint alls in Orig z sii! (geht zurück zur Hütte. Öffnet die Türe und ruft nach seinem Hund) Barri chumm!... Baarri... (schliesst die Türe wieder) Ou, wie isch das en dumme Hund! De hett no meh Angscht weder ich! Nur en Huffe frässe und schie... se, suscht chan er nüüt! (schleicht ängstlich mit dem Gewehr im Anschlag nach hinten rechts ab)*

**Gigax:** *(kommt in normaler Kleidung von hinten rechts. Hat einen Finger in Lukas Gewehrlauf gesteckt und drückt diesen so retour auf die Bühne. Nimmt das Gewehr an sich)* Jetz ha di aber verwüsch! Du bisch sicher de wo eis Tier nach em andere abschüss! Und machsch nochher en Aazeig und behauptisch, dass sie gsthole worde sind! Weisch wie mer dem seit? Versicherigsbetrug!

**Lukas:** *(zittert vor Angst)* Glaub mer s, Gagix... oder Gigax! Ich ha bestimmt nüüt Schlächts im Sinn! Ich bi verwachtet will i en Lärm ghört ha! Bis ich use cho bi, han i nur no en erstickende Schrei ghört! Es hett grad tönt wie e Chatz wo s erscht mol en katerliche Kontakt gha hett!... Und das alles us genau dere Richtig wo du jetz cho bisch!

**Gigax:** Das cha ned sii, denn hett ich wahrschiinlich öppis gseh oder ghört!

**Lukas:** Du laufsch umenand wie ne Wanderniere! Drum gsehsch und ghörsch nüüt! Du hesch es doch nur uf mini Tochter abgseh! Aber du muesch doch selber iigseh, dass ihr überhaupt ned zäme passed!

**Gigax:** Was ned passt, mache mir denn scho z passe! Du chönntsch jo froh sii, wenn du dini Tochter öppe under de Hube hettsch!

**Lukas:** Ebe jo, alles mit Gwalt! Und überhaupt hoff i ned, dass sie eso en umenand strielende Vagabund muess näh, wo sich jedesmol als öppis Anders usgitt!

**Gigax:** Wird nur ned no frech, suscht mach i e Strofaazeig! Eine wo am früehe Morge mit eme Gwehr umenand lauft, macht sich ziemlich verdächtig zum chrummi Sache z mache! Du chasch dir s überlegge, öb wettsch für mich es guets Wort iilege bi de Vreni! Uf jede Fall nimm i dini Knarre mit als Bewiismittel!

**Lukas:** Ich säg der eis! Ich chlage dich ii wäge Verlüümdig, falschi Verdächtigung und Erpräsig! Meinsch gwüss somene Pejass gäb ich mini Tochter!

**Gigax:** Mir wänd denn luege wär glaubwürdiger überehunnt! *(hinten links ab)*

**Lukas:** *(ruft ihm nach)* Loh mir mis Gwehr do!... *(zu sich selbst)* Ou, wie isch das en stuure Bock!... Wär isch das überhaupt? Langsam chunnt mir de Typ unheimlich vor!... Jänu, jetz nimmt mi aber wunder, wo s Vreni steckt!... *(ruft nach Vreni)* Vreni!... *(schaut zuerst hinter dem Haus links nach, dann rechts hinter dem Stall. In diesem Moment kommt ihm David von rechts entgegen)*

## 2. Szene

David, Lukas, Gret

**David:** *(ist eine etwas verwahrloste, aber stets fröhliche Erscheinung. Struppig, unrasiert und trägt mitgenommene Kleidung)* Bisch scho uuf, Lukas?

**Lukas:** *(etwas mürrisch)* Nei, ich bi no im Bett und schloofe tüüf!

**David:** Aha!... Denn bisch am Nachtwandle? Du bisch halt au eso en mondsüchtige Kauz!

**Lukas:** Wär mondsüchtig isch, weiss i nonig! Aber ich frog mi ehner, was du do uf mim Hof machsch am früehe Morge? Hesch kei Arbet deheim uf öichem Hof?

**David:** Ich hett scho! Aber ich loh lieber d Mueter echli schaffe! Weisch, die säb muess nümme eso lang wien ich! *(lacht)* Und überhaupt, ich ha no müesse e Glogge go sueche, wo e Chue verlore hett!

**Lukas:** *(ist betrübt)* Nur grad eini goht jo no! Ich ha au scho zwee verlore!... Aber bi mine isch a beidne no e Chue dra ghanget! Weiss de Gugger wär do sie s Unwäse triibt uf öisem Hof?

**David:** *(schelmisch)* Meinsch de Gugger hetts gfrässe? Ich ha geschter eso en dicke Cheib gseh umenand flüüge!

**Lukas:** Muesch di gar ned no luschtig mache! Das isch kein Gspass meh!

**David:** Du muesch nur echli Geduld ha! Die chunnt denn scho wieder zum Vorschiin! Oder weisch, villecht hetts de Liebesnerv chräbelet und jetz sinds öppis go sueche! Wenn weisch was i meine! *(lacht)*

**Lukas:** Bisch en Plauderi! De Gigax hett s Gfüehl, ich sälber schüüssi mini eigne Tier ab, und tüeg eso d Versicherig betrüge! So eine spinnt jo!

**David:** Wär isch de Gigax?

**Lukas:** Das isch eine wo sich siit Tage do i de Gägend umenand triibt. S einti mol seit er, er seig Händler. Denn spielt er sich uuf wie en Polizischt und denn grad wieder suscht öppis! Ich glaube de cha alles! Das chönnt no en Politiker sii, di säbe rede überall mit! Au wens vo Tuten und Blasen kei Ahnig händ!

**David:** Aber du muesch ihm jo au ned alles go verzelle! Gsehsch jo jetz was devo hesch! Die Sach chönd mir au regle ohni de Landschtriicher! Dini Chüe werded jo ned grad gstohle worde sii!

**Gret:** *(kommt von hinten rechts. Gret ist eine unordentliche, stets schlecht gelaunte Person, trägt Latzhosen und Stiefel. Spricht zu David)* Was bisch denn du do am umenand plaudere? Hesch wieder emol s Gfüehl, d Muetter machi die ganz Arbet ellei!

**David:** Eigentlich scho! Aber, wenn du au no fortlaufsch, goht jo wieder gar nüüt meh! Aber jo, i ha sowieso welle go! *(wieder zu Lukas)* Also Lukas, ned z vill rede! *(hinten links ab)*

**Gret:** Was meint er mit dem?

**Lukas:** Hesch ned ghört, ich söll ned z vill rede! Hett er gseit!

**Gret:** Händ denn ihr kei Näschter meh uf öichem Hof? Oder werum schloft denn s Vreni do hinderem Stall äne?

**Lukas:** *(ist entsetzt)* Wär schloft wo?

**Gret:** Dini Tochter halt! Aber ich ha sie schlofe loh!

**Lukas:** *(nervös)* Das gits doch ned! Ich ha sie jo no ghört im Huus inne won ich verwachtet bi! Wo hesch denn die gseh?

**Gret:** Ebe, hinder em Stall! Chumm, ich zeig der wo! *(beide wollen nach hinten rechts ab)*

### 3. Szene

Vreni, Lukas, Gret

**Vreni:** *(kommt ihnen, fürs Publikum aber noch nicht zu sehen, entgegen)*

**Lukas:** *(kommt, wie auch Gret wieder retour und spricht zu Gret)* Do hinde chunnt sie jo! Du bisch au immer die gliich Grüchteverbreiteri!

**Gret:** Ich stinke im Fall ned! Das isch nur Chueduft wo du als Grüch inhaliersch!

**Lukas:** Ich ha nüüt vo Grüch gseit! Ich ha gseit du verbreitisch Grücht, „Gerüchte“! Oder wenna besser verstosch, du verzellsch en Seich! *(dann zu Vreni die jetzt auf der Bühne erscheint)* Wo chunsch denn du jetz her?

**Vreni:** Vo do hinde! *(strahlend, träumerisch)* Han ich es schöns Erläbnis gha! En Prinz isch mir begänet und hett mi fascht z tod küsst!

**Lukas:** *(schaut entsetzt)* Jetzt isch es ganz verbii mitere! *(schüttelt den Kopf und geht links ab ins Haus)*

**Gret:** Was isch denn los mit dir? Bruchsch en Dokter!

**Vreni:** Nei, nur kein Dokter! Ich wett de Prinz chämt nomol!

**Gret:** Ich glaube dir schrubets würkli! Was hesch denn mit dem Prinz?

**Vreni:** *(schwärmt)* En grosse Mantel hett er aagha! Denn hett er mich eifach gnoh und hett mi küsst!... D Nase hett er mir zue ghebt... *(zeigt es vor)* will er wahrschinli gmeit hett, ich stinki!... Aber gäll, säb isch jo normal am Morge?

**Gret:** Säg emol spinnsch du? Die ganz Sach gseht ned nach „normal“ uus!... Un denn, was isch wiiter passiert? Das gseht doch ehner nach eme Verbräche uus!

**Vreni:** *(verträumt)* Gäll, vergunsch mer s? Nei... das isch keis Verbräche! *(schwärmt)* De erscht Kuss im Läbe isch doch keis Verbräche!... Wie en Adler *(zeigt mit den Armen Flügelschläge an)* isch er über mir gschwäbt!... Wie im Traum!... Won ich denn verwachtet bi, isch er furt gsi, min Prinz! *(geht ab bis zur Haustüre nach links)* Min Prinz! *(ab ins Haus)*

**Gret:** *(schüttelt den Kopf)* Ich ha scho immer gseit, dass die Lüüt uf em Schattehof ned alli Tasse im Schrank händ! *(will hinten links ab)*

#### 4. Szene

Berta, Babett, Gigax, Gret, Vreni

**Berta:** *(kommt von hinten links. Trägt nicht gerade auf den Berg passende Kleidung und begegnet Gret noch vor dem Abgang. Berta ist die ältere Schwester von Lukas und meint, die Weisheit mit dem Löffel gefressen zu haben. Ist jedoch falsch, hinterhältig und habgierig. Berta wird dauernd von Gigax beschattet)* Hallo sie! Was mached sie do uf öisem Hof!

**Babett:** *(kommt mit Berta, und ebenfalls in eher städtischer Kleidung von hinten links. Ist die etwas jüngere Schwester von Berta. Babett ist der Schatten von Berta und spricht nur wenig)* Nimmt mi au wunder?

**Gigax:** *(schaut bei der folgenden Szene ab und zu, getarnt, jedoch fürs Publikum gut sichtbar, von hinten aus einem Versteck und spioniert)*

**Gret:** *(schaut Berta angriffslustig an)* Nimmt mi wunder was de das aagoht? Chunsch do here wie en usgstopfti Bergwachtle wo d Füess verchehrt im Arsch hinde hett und laferisch vo „öisem“ Hof!

**Berta:** Du ordinärs Wiibervolch... was fällt dir eigentlich ii? Ich bi e geboreni Gwerder. Genau wie d Babett au! Und das isch de Hof vo öisne Eltere! Will ich jo die Ältischt bi und d Babett die Zweitältischt, wirds wohl eso sii, dass mir Aspruch händ uf das schöne Fläckli Erde! Und ned eifach de Jüngscht, nur will er z dumm gsi isch zum e Frau werde!

**Babett:** Joo!

**Gret:** De Lukas hett aber immer gseit, sini Verwandtschaft seig zum hüüle!

**Babett:** Joo! Säb sind mir!

**Berta:** *(schaut Babett scharf an)* Schalt bitte s Hirni ii! *(wieder zu Gret)* Er hett zwee Schwöschtere, und das sind mir!

**Gigax:** *(ist ab jetzt nicht mehr zu sehen)*

**Gret:** Wieso verschwiegt denn mir de Lukas, dass er zwee Schwöschtere hett? *(geht um Berta und Babett herum und betrachtet diese genau)* Wenn mer euch zwar rächt aalueget, wunderets eim ned! Aber ebe, ihr sind wahrschiinli au ned sälber gschuld! Mer cha sich jo d Eltere ned ussueche! Also, denn en guete Ufenthalt! Adie! *(hinten links ab)*

**Berta:** *(spielt sich nach hinten, schaut Gret nach und spricht für sich)* Hett die öppe gmeint mir wüssed ned wär sie isch?

**Babett:** Weiss ned!

**Vreni:** *(kommt aus dem Haus von links und bemerkt Berta und Babett nicht. Fängt schon im Haus an zu reden, setzt sich irgendwo hin und träumt vor sich hin)* Die alt Tschättere cha au froh sii, dass sich de Hund ned use getrout! Suscht hetti sie jetz e Schnörre voll Schinke weniger am Füdle!

**Berta:** *(ist eine zeitlang still und unbemerkt dagestanden und beobachtet Vreni)* Wär isch die gstessti Dame wo mich als alti Tschättere betitlet, wenn ich froge dörf!

**Babett:** Nimmt mi au wunder!

**Vreni:** *(erschrickt, dass sie von ihrem Sitz fällt)* Um Gotteswille händ ihr mich jetz aber verschreckt! Ich ha doch ned euch gmeint! Ich ha doch die gmeint wo gseit hett, ich spinni! Wär sind ihr?

**Berta:** S gliich chönnte mir dich froge? Bisch du do i de Ferie oder bisch en Aagestellti?

**Babett:** Nimmt mi au wunder!

**Vreni:** Ich weiss es au ned! Ich bi eifach do!

## 5. Szene

Lea, Vreni, Lukas, Gigax, Berta, Babett

**Lea:** *(ist verkleidet als eine schwarzhaarige, feurige Italienerin. Spricht deutsch mit etwas komisch italienischem Akzent! Trägt aber eine Perücke, welche sie dann später abnehmen kann. Sie kommt von hinten links als Touristin mit Rucksack und Wanderstock)* Bonschorno alletutti! Bine i do rigtige ufe dem Sattelhofe!

**Vreni:** Schattehof heisst das!

**Lea:** A heisse Schattehofe! Ude was heisse wäne Sunne schienet? *(lacht)*

**Vreni:** *(geht zum Haus und spricht zum Publikum)* Wo händs ächt die furt gloh! *(ruft nach ihrem Vater)* Vatter... Bsuech! *(setzt sich wieder an ihren Platz und träumt weiter)*

**Lukas:** *(kommt mit Melkgeschirr aus der Hütte)* Mir sötted go melche!... Ah... grüezi mitenand! Sueched ihr öppis?

**Gigax:** *(spioniert wieder)*

**Lea:** I hane mi angemeldet füre magge de Urlaube!

**Lukas:** Aha, denn sind sie s Fräulein Gregoli wo geschter telefoniert hett!

**Vreni:** *(schaut Lea von der Seite her an)* Sie gsehnd aber ned grad uus wie en Gooli!

**Lea:** No, no, niete heisse Gooli! I magge heisse Gregoli!

**Vreni:** Jo vo mir uus!

**Lukas:** Und ihr?... *(erschrickt und sein Gesicht verfinstert sich)* Jesses... das sind jo d Berta und d Babett! Was mached denn ihr do?

**Berta:** Grüezi seit mer zerscht! *(zu Babett)* Ned grad en fründliche Empfang! *(dann wieder zu Lukas)* Zerscht emol Ferie mache und nochheär lueged mir denn wiiter!

**Babett:** Joo!

**Lukas:** Ich ha aber kei Platz! Will, mir händ nur ei Chammere! Vreni, gang em Fräulein Gregoli no go s Bett zwäg mache!

**Vreni:** Das chan i ned!... Sie hett jo Ferie, denn wird sie das wohl sälber chönne mache!

**Berta:** Die säb Chammere isch leider vo öis beschlagnahmt! Denn muess halt euere Feriegascht im Stall äne schlofe!

**Babett:** Joo!

**Lukas:** Mached was ihr wäne! Ich muess jetz go melche! Wo isch denn de Hund?

**Vreni:** I weiss es au ned! Chasch jo eini vo dene zwee mitnäh!

**Lea:** Jä... gane denn euere Hundeli au magge de mulche?

**Lukas:** Nei, mulche chan er ned, und melche au ned! Aber s Vieh zuetriebe chönnt er mir hälfe!

**Lea:** Una wo hettä denn do Fee? Wase ische Fee!

**Lukas:** Ich meine s Vieh zuetriebe! D Chüe! Mir säged zu de Chüe ebe Vieh!

**Lea:** A jetze i hane magge gappito! Magge die Hundeli für di Gueli „wauwau“! I hane mi exagte wäge de Gueli füre dä Urlaube entschidedet! Häse du e huffe Fee?

**Gigax:** *(ist ab jetzt nicht mehr zusehen)*

**Lukas:** *(jammert)* Ebe han i bald keini meh! Vor allem Chüe werded immer weniger! Es sind jo nur no vier, und die hämmer zur Ziit uf de obere Weid obe! Zweek Chüe sind nümme ume! Ich ha kei Ahnig wo die chönnte sii! Mir händ aber no en Huufe Rinder, Schof und Geisse!

**Lea:** I magge mi freue scho! I gomme denn spöter magge hälfe sueche!

**Berta:** Do gseht mer s jo wieder! Ich ha scho lang gwüsst, dass du de Betrieb losch verlottere! Drum simmer eigentlich do! Mir hett e höheri Macht gseit, Berta, gang lueg zum Rächte!

**Babett:** Joo!

**Lukas:** Euch hett ämel sicher niemer piffte! Würd mi ned wundere wenn ihr hinder dene ganze Intrige würded schtoh! De Barri, öise Hund hett sich au zerscht verchroche won ihr i de Nöchi gsi sind!

**Berta:** *(beschwörend)* Es waren die Geister die mich riefen!

**Babett:** Joo!

**Lukas:** *(zu Babett)* Chasch eigentlich du au emol öppis Anders säge als nur „joo“?

**Babett:** Joo!... Nei!

**Lukas:** *(abseits)* Es sind immer no die gliiche zwee! Als Mischtchraterli sinds usgfloge und jetz chömeds als Suppehühner zrugg! *(wieder zu den andern)* Also, ich muess jetz aber go melche! Chumm Vreni, wenn de Hund ned ume isch muesch halt du mitcho! Zeigsch de Lea no wos Zimmer isch und denn chunsch! *(hinten rechts ab)*

**Vreni:** Jetz bin i au no Hundeersatz! E tolli Karriere uf dem Puggel obe!

**Berta:** Du hesch jo jetz ghört wär mir sind!

**Babett:** Joo!

**Vreni:** *(abschätzig)* Jo, am Tüüfel sini Grossmüetere!

**Berta:** Nei, dini Tante!

**Vreni:** *(schaut sie lange an)* Isch das aasteckend?

**Babett:** Joo!

**Berta:** Tue nur ned fräch! Suscht lehrsch mi denn kenne! Also gang jetz öis d Chammere go zwäg mache!

**Vreni:** Das goht mich nüüt aa! S Fräulein Gregoli hett sich aagmeldet und schloft i de Gäschtechammere!

**Lea:** Also i bine heissa Lea! Muss niente sage Fräulein Gregoli!

**Vreni:** *(etwas gereizt)* Aha! Und i bi di „heisse“ Vreni! *(wackelt etwas umständlich mit dem Po)* Also chumm mit! *(geht mit Lea ab in die Hütte)*

## 6. Szene.

Berta, Babett, Gigax, Vreni

**Berta:** *(nutzt die Gelegenheit, schaut sich um und winkt währenddessen mit einem weissen Taschentuch nach hinten um jemandem ein Zeichen zu geben)* Mir sind glaub ned grad willkomme uf mim Heimet! *(schaut in den Stall und rümpft die Nase)* I dem cheibe Gstank inne sölled mir übernachtete?

**Babett:** Joo!

**Berta:** Jetzt hör äntlech uf mit dim „Joo“

**Babett:** Joo!... Du hesch jo gseit ich söll d Schnorre halte, wenn du am rede bisch! Und ich söll nur mit jo oder nei antworte, wenn ich gfrogt werde! Also...

**Berta:** (*giftig*) Ich has jo ned grad eso gemeint!

**Babett:** Ned?... Wie denn?

**Gigax:** (*kommt von hinten rechts*) Was söll die Zeichesproch wo sie vorher gmacht händ?

**Berta:** Aha! Do hetts no meh Feriegäscht! Würd mi no interessiere was sie das aagoht? Ihne hani ganz sicher ned gwunke! Und überhaupt, grüezi seit mer zerscht, bevor mer eim aafangt usspioniere!

**Gigax:** Entschuldigung! Grüezi mitenand! Ich bi de Gigax! Ich spioniere ned! Ich kontrolliere nume!

**Berta:** Aha! En Kontrollbeamte!

**Gigax:** Genau! Oder so öppis!

**Babett:** Aha! En Kontrollbeamte!

**Berta:** (*schaut Babett mit einem vielsagenden Blick an*)

**Babett:** Du hesch jo gseit, ich söll meh rede! Also...

**Berta:** Aber ned mich nooäffe!

**Vreni:** (*kommt wieder aus der Hütte und macht sich bereit zum gehen. Zu Berta*) Ihr chönd euch sälber iinische im Stall äne!

**Gigax:** Wo gosch hee, Vreni! (*macht Anstalten mitzugehen*) Wart ich chume mit! Ich hett no öppis z bespräche mit dir!

**Vreni:** Ich mit dir jetzt aber ned! Wäge was bisch do?

**Gigax:** Das hett verschiedeneni Gründ! Zum einte laufe do Sache wo ned unkriminell z betrachte sind, und zum Andere wäge...

**Vreni:** ...Denn lauf dine Sache noch, ned mir! (*hinten rechts ab*)

**Gigax:** *(schaut Vreni lange nach. Wendet sich dann wieder Berta und Babett zu)*  
Guet, denn halt zu euch! Händ ihr en Uswiis debii?

**Berta:** Ich wüsst ned für was! Chasch öis jo in Natura betrachte, denn bruchsch keis Föteli! Und sie säge muesch mir au ned! Ich bi die zukünftigi Bsitzeri vo dem Hof! *(zeigt auf Babett)* Und sie do isch min Handlanger!

**Babett:** Nei!

**Gigax:** Umso wichtiger erschiint mir, dass ihr euch müend chönne uswiise!

**Berta:** *(überhört die Bemerkung von Gigax)* Du suechsch öppis und ich chönnt dir villecht hälfe! Ich stelle fescht, du bisch scharf uf s Vreni! Stimmts oder hani rächt?

**Babett:** Stimmts oder hani rächt?

**Berta:** *(schaut Babett wieder durchdringend an)*

**Babett:** Jojo, isch jo scho guet!

**Gigax:** Ned nur uf s Vreni! Und wie wetted ihr mir hälfe?

**Berta:** Ich muess das Vreni usem Wäg schaffe! Und will du eso spitz bisch uf sie...

**Gigax:** Wohär weisch du, dass ich söll spitz sii uf s Vreni? Und werum müend ihr sie usem Wäg schaffe?

**Berta:** Das isch eigentlich öisi Sach!

**Babett:** Das isch eigentlich öisi Sach!

**Berta:** *(schaut Babett wieder durchdringend an. Zeigt auf eine in einer Ecke befindliche Sitzmöglichkeit)* Hock det übere und bis äntlech ruehig!

**Babett:** Wenn du mich nur immer chasch umenand kommandiere! *(setzt sich aber gehorsam in die Ecke)*

**Berta:** *(wendet sich wieder an Gigax)* Aber wenn du mir hilfsch, muess ich s dir halt säge! Wenn ich s Vreni furt bringe, denn han ich s eifacher zum de Hof wieder zugg i min Besitz z bringe, wo mir de Brüeder gstohle hett!

**Gigax:** Aha!... *(studiert)* Emol luege was sich mache loht! Hesch suscht kei frömde Lüüt gseh do i de Nöchi?

**Berta:** Nei, han i ned! Das heisst, en Feriegascht isch vorher do iitroffe!  
Die säb chasch denn grad au mitnäh! Die säb hocket nämli i mim  
Näscht hinde!

**Gigax:** Wie heisst die Person?

**Berta:** Lea Gregoli! Werum? Was isch mit dere?

**Gigax:** Nüüt! Du hesch jo gseit ich müess luege, dass sie verschwindt!  
Denn muess i dänk au wüsse wie sie heisst!... Also, ich muess wiiter!  
Uf wiederluege! (*hinten links ab*)

## 7. Szene

Berta, Babett, David

**Berta:** Uf wiederluege! (*schaut ihm lange nach und spricht dann für sich*) En  
komische Vogel! Do muess i mich glaube echli in acht näh! (*dann zu  
Babett*) Du gosch emol öisi Weide go inspiziere! Aber getarnt, du  
weisch jo wie!

**Babett:** Jo, mit emene rote Rägeschirm und emene Alphorn! Für was  
luegsch mich eigentlich aa?

**Berta:** (*schaut Babett nur durchdringend an*)

**Babett:** Jo, ich gang jo scho! (*hinten rechts ab*)

**David:** (*kommt von hinten rechts*) Grüezi! Händ sie mir vorher es Zeiche  
gäh? Ime Brief won i übercho ha isch gstande, e Dame warti uf mich  
uf em Schattehof!

**Berta:** Wär bisch du?

**David:** Ich bi de David, de Sohn vom Chreihof!

**Berta:** Bisch sicher? Bedänklisch, din Aablick! Ich bi d Berta Gwerder!  
Besitzerin des Schattenhofes!

**David:** Jä, gits do „mehrere“ vo dene Schattenhöf!

**Berta:** Nei, ich rede vo „dem“ Hof!

**David:** Aber do isch doch de Lukas...

**Berta:** ...Nümme lang! Ich ha drum z rede mit dir!

**David:** D Mueter wartet aber uf mich!

**Berta:** D Mueter! (*überlegt lange*) Und de Vatter ned?

**David:** Nei, de läbt nümme! Hett d Mueter gseit!

**Berta:** Hett dir d Mueter au gseit, dass sie ned dini rächt Mueter isch? Du bisch nämli es Findelchind!

**David:** (*schaut Berta entgeistert an*) Was verzellsch du do für Märli?

**Berta:** Das sind kei Märli!... Und wenn ich dir würd säge, dass de Vatter doch läbt! Was seisch denn?... Gäll do stuunsch!

**David:** (*schaut Berta immer entgeisterter an*) Was söll das heisse? Du meinsch...

**Berta:** (*beschwörend*) Ich meine ned! Ich weiss es! Ich ha der s jo scho lang welle säge!

**David:** (*ist sehr irritiert*) Wo isch er denn? Wie heisst min Vatter? Was macht er denn? Und was isch mit de Mueter?

**Berta:** Das chan i dir im Moment ned säge! Zerscht muesch du mir hälfe! Und alles schön mache won ich dir säge! Drum han i dich do here bschtellt!

**David:** Ich chume ned noche! Was söll das heisse!

**Berta:** Ich ha dir drum vorig es Zeiche gäh, dass du söllsch do here cho, damit ich weiss wie du uusgesehsch! Übrigens, das mit de Chüe verschwinde loh hesch usgezeichnet gmacht!

**David:** (*entsetzt*) Was söll ich gmacht ha?... Erstens bin i nur per Zuefall do here cho! Und zweitens han i nüüt z tue mit dene Chüe wo verschwunde sind!

**Berta:** Eso gfallsch mir! Du bisch en super Schauspieler! Mach wiiter eso! Ich muess jetz nomol is Dorf äbe go d Koffere hole! (*schaut nochmals in den Stall und macht ein fürchterliches Gesicht*) En Huufe Deckene und öppe 10 Liter Parfüm muess i denn au no mitbringe! Suscht halt ich s denn do inne ned uus! (*nochmals zu David, der sie nur noch sprachlos anstarrt*) Ich wohne denn übrigens do i dem Stall inne, wenn mich im Fall suechsch! (*macht kehrt und verschwindet hinten links*)

**David:** (*geht ihr ein paar Schritte nach und starrt Berta sprachlos nach*)

## 8. Szene

Gigax, David, Lea

**Gigax:** *(kommt von hinten rechts)* Was luegsch eso entsetzt? Isch der wieder emol eini ab?

**David:** *(ist sehr deprimiert)* Wenns nur das wär! D Berta, ich meine, do die Schwöschter vom Lukas hett mir grad gseit, dass...

**Gigax:** ...Ich weiss! Muesch mir nüüt verzelle! Ich weiss alles!

**David:** *(verwundert)* Was, du weisch das au? Aber...

**Gigax:** ...Alli wüsseds, nur du ned! Aber nimms ned so tragisch!

**David:** *(entsetzt)* Nimms ned so tragisch? Du bisch villecht guet! Weisch was mir die wott aahänke? Ich söll em Lukas s Vieh gsthole ha!

**Gigax:** Jo ich weiss, dass das natürlig ned eifach eso chasch zuegäh! Aber mir dörf es scho aavertroue! Villecht chönnti dir sogar hälfe!

**David:** *(ist noch entsetzter)* Aber ich ha doch...

**Lea:** *(kommt aus dem Haus und strahlt Gigax an)* Do isse jo mine Gigaxeli! Warume du mi magge so lange hogge lasse? *(schmiegt sich an Gigax)* Io warte ufe Amore site zwoe Stund!

**David:** *(starrt Lea an und beobachtet die Szene irritiert, weil er meint unter der Maske seine Freundin zu erkennen. Geht dann schüchtern zu ihr hin und lüftet ein paar Haare von Lea, um ihr Gesicht besser zu sehen. Ist sich aber der Sache sehr unsicher)* Isch das ned... bisch du ned... nei, das cha ned sii! *(schüttelt unsicher den Kopf, geht nach hinten, dreht sich nochmals um, beobachtet die zwei nochmals und verschwindet nach hinten rechts)*

**Gigax:** Was hett jetz de?

**Lea:** Jo nüüt! Ich meine... io weisse niente!

## 9. Szene

Lukas, Lea, Vreni, Gigax, David

**Lukas:** *(kommt von hinten rechts. Hat den letzten Satz noch mitbekommen)* Io weisse au niente! Jetz han i d Schnautze voll! Jetz muess d Polizei uf de Lade. Jetz isch de Räschte vo mine Chüe au no verschwunde!

**Lea:** Wase magge mite dine Gueli? Magge verschwunde? I gomme magge halfe suche. Wo ische de Wauwau?

**Lukas:** Ebe, de chunnt jo au numme zum Huus uus!

**Vreni:** *(kommt ebenfalls von hinten rechts und hat den Mantel in der Hand, den Gigax am Anfang getragen hat)* Lueged emol was ich do gfunde ha!  
*(breitet den Mantel aus und halt ihn hoch)*

**Gigax:** *(erschrickt und springt zu Vreni)* Was hesch du do? Wo chunsch mit dem Mantel her?

**Vreni:** Ich ha de do hinde i de zamegheite Holzerhutte gfunde!

**Gigax:** *(aufgeregt)* Was hesch no meh gfunde?

**Lukas:** Was isch mit dir los? Wieso tuesch eso ufgregt? Kennsch du oppe de Mantel?

**Lea:** I tangge ganne Gigaxeli die Manteli so!

**Gigax:** *(vewandelt sich in die Ruhe selbst)* Nei! Wieso sott jetz ich de Mantel kenne? Mir chunnt nur echli spanisch vor, dass irgend opper eifach en Mantel verluurt!

**Vreni:** *(riecht an dem Mantel)* De Gruch chunnt mir irgendwie bekannt vor!  
*(uberlegt, studiert und riecht wieder)* Genau!... Das isch de Gruch vo mim Prinz!  
*(vertraumt)* Min Prinz! Ich muess nomol go luege ob sich de au irgendwo versteckt hett bi de Holzerhutte!  
*(verschwindet wieder hinten rechts)*

**Gigax:** Wart i chume mit! Ned das dir no oppis passiert! *(will ihr nach)*

**Vreni:** *(aus dem Hintergrund)* Ich bruche dini Hilf ned! Min Prinz hilft mir scho!

**Gigax:** *(bleibt starr stehen)* Aber...

**Lea:** Hase du gehort! Si bruche dir niente!

**Lukas:** Es wird immer misterioser! Mini Chue verschwinde! I de Holzerhutte hinde spinnt mis Vreni mit eme Mantel umenand! Jetz han i eifach gnueg! Jetz gang i uf de Polizeiposchte und mache e Aazeig!  
*(geht mit seinen Melkerutensilien, welche er immer noch bei sich hat, ins Haus)*

**Gigax:** Jetzt springt de zur Polizei wäg some Seich! Mer chönnt scho meine es seig ihm öppis Wärtvolls furtcho!

**Lea:** Schnörr ned eso abschätzig! *(bemerkt sofort, dass sie wieder in ihre Sprache gefallen ist)* Io meine niete magge so blöda Snorre!

**Gigax:** *(schaut Lea irritiert an)* Was söll jetz das? Bisch...

**David:** *(kommt von hinten links)* Sind ihr immer no do?

**Gigax:** Nei, jo, ich ha eigentlich grad welle goh!

**Lukas:** *(kommt wieder aus dem Haus)* Denn chasch grad mit mir cho! Ich gange grad au durab!

**Gigax:** Wär seit denn ich göng durab? Villecht gang i au do hindere! *(zeigt nach hinten rechts)*

**David:** Es schadt nüüt wenn du de Lukas echli tuesch beschütze!

**Lukas:** Also chumm! *(hinten links ab)*

**Gigax:** *(etwas mürrisch)* Jo denn halt! *(ebenfalls hinten links ab)*

**David:** *(schaut Lea, sobald beide gegangen sind, lang und stillschweigend an)* Ich wird ned ganz schlau! Du bisch doch...

**Lea:** Io bini Lea Gregoli! Pasta! Gase du jo frage de Carabinieri! *(ab ins Haus)*

**David:** *(schaut ihr nach, schüttelt den Kopf und setzt sich irgendwo hin)*

**Vorhang**

## 2. Akt

### 1. Szene

Vreni, Lukas, Berta, Babett

Es ist ein Tag später. Lukas sitzt vor dem Haus und wartet. Vreni schaut gähnend aus dem Fenster.

**Vreni:** Guete Morge Vatter! Magsch do dusse zmorge ässe? Oder chunsch i d Chuchi?

**Lukas:** *(mürrisch und wortkarg)* Jo, bring öppis usse!

**Vreni:** Sind öisi Störfaktore nonig ufgstande?

**Lukas:** Weiss ned!

**Berta:** *(kommt in schmutziger Kleidung aus dem Stall und hat noch etwas Heu oder Stroh auf dem Kopf)* Das isch denn s erscht und letscht mol, dass ich do inne schlofe! En söttige Gstank haltet jo niemer uus! *(setzt sich an den Tisch)*

**Lukas:** Hoffentlich s zweite!

**Babett:** *(kommt ebenfalls zerzaust aus dem Stall und zieht eine Rolle WC Papier hinterher, die irgendwo in der Hose eingeklemmt ist)* Eso en Gstank! *(watschelt um den Tisch)*

**Lukas:** Jo mir wüsseds! Wäge dem muesch ned schnörre wien es Buech! *(sieht nun das Papier das sie hinterher zieht)* Muesch jo ned i d Hose...

**Babett:** *(sieht nun das Missgeschick und fängt an, an dem Papier zu ziehen das aber nicht zu enden scheint)* Ich ha sicher ned i d Hose gmacht *(geht dann an dem Papier entlang zurück in den Stall)*

**Lukas:** *(setzt sich an den Tisch und riecht an Berta)* Mein Gott, wie stinksch denn du?

**Berta:** Wie mer halt stinkt, wenn mer im Stall muess schlofe wie en Hund!

**Lukas:** Das schmöckt aber ned nach Stall! Das stinkt ehner nach Puff!

**Vreni:** *(kommt aus dem Haus und bringt für sich und den Vater Frühstück)* So Vatter, jetz chasch ässe! *(ischt nur für Vater und für sich selbst)* En Guete!

**Berta:** *(schaut mit gierigem Blick auf das Essen)* Was isch mit öis? Chömed mir nüüt über?

**Vreni:** Bi mir isch kei Bschtellig iigange!

**Berta:** Das isch e Frächheit! Zerscht muess mer froh sii, wenn mer dörf ime sone stinkige Loch inne schlofe, und nochher wänds eim ned emol zmorge gäh! *(ist nun recht wütend, geht zum Stall und schreit nach Babett)* Babett, wo bisch denn so lang! Muess ich eigentlich alles sälber mache?

**Babett:** *(kommt wieder aus dem Stall und hat immer noch das Papier angehängt)* Ich chume jo! Ich ha de Aafang vom Papier ned gfunde!

**Berta:** De hesch am Füdle! Hei bisch du blöd! Chasch dänk do zue abrupfe! *(reisst ihr das Papier an der Hose ab und schmeisst den Rest zurück in den Stall)* Lueg gschieder, dass es öppis zmorge git!

**Babett:** *(abseits mit Berta)* Ich ha au nüüt mitgnoh!

**Berta:** *(abseits mit Babett)* Denn frogsch halt s Vreni öb sie für öis öppis hett!

**Babett:** *(geht zu Vreni)* Vreni, dörfte mir ächt au öppis zmorge ha?

**Vreni:** Usnahmswiis jo! Aber das isch die letscht Mohlziit für euch! Nochher müend ihr sälber ufcho für euche Frass! Chasch sälber öppis go hole!

**Babett:** Danke! *(zu Berta)* Das hetsch jo du au chönne froge!

**Berta:** So wiit abe lohn ich mich ned! Unerhört wie mer do behandlet wird! Wenn das öisi Eltere no gsehcted!

**Babett:** Jo! *(ab ins Haus)*

**Berta:** *(geht an den Tisch und setzt sich wieder)* Bisch scho gsi go luege? Händs dir de Räschte Viecher au no gstohle?

**Lukas:** *(mürrisch)* Tue nur ned eso zynisch! Aber ich bi gsi go luege! Es isch alles no umenand, wo geschter no gsi isch!

**Berta:** An dinere Stell würd ich halt bi de Tier bliibe und ned do here cho zmorge ässe! Eso glaub i scho, dass alles furt chunnt!

**Lukas:** Das isch wohl mini Sach!

**Babett:** *(kommt mit einem übertrieben gefüllten Tablett aus dem Haus und setzt sich neben Berta)* So, en Guete!

**Lukas:** *(sperrt Mund und Augen auf. Kann aber nichts sagen)*

**Vreni:** *(ergreift die Initiative)* Wie sind ihr zwei uverschämte Wiiber! Fräch wie mer nur fräch cha sii! *(nimmt das Tablett an sich und gibt den beiden einen kleinen Bissen Brot und etwas Kaffee)* So, das langet für euch! *(bringt den Rest ins Haus und kommt sofort wieder zurück)*

## 2. Szene

Berta, Babett, Lukas, Vreni

**Berta:** Wenn du nur mit allem muesch übertriibe!

**Lukas:** Ihr müend enand nüüt vorhebe! Lueged eifach, dass ihr wieder det hee gönd won ihr her cho sind!

**Babett:** *(zu Berta)* Wenn chunnt de Dokter Mörgeli?

**Berta:** *(gibt Babett einen Stoss)*

**Babett:** Was isch jetz wieder? Red i jetz scho wieder z vill?

**Berta:** Z vill ned, aber du sött sch zerscht studiere bevor öppis seisch!

**Babett:** Denn säg i halt wieder nüüt meh!

**Vreni:** Wär isch de Dokter Mörgeli?

**Berta:** *(zu Babett)* Gsehsch jetz du Schwafli-Tante, jetz fangt die Frogerei scho aa!... Aber isch jo gliich! *(zu Lukas und Vreni)* Wenn sie s jetz scho uusplauderet hett, chan ich s euch jo säge! De Dokter Mörgeli isch öise Rächtsaawalt!

**Vreni:** *(verwundert)* Was wott de do? Für was bruched ihr en Rechtsanwalt?

**Lukas:** Gschiidi Lüüt bruched das! Angeblich!

**Berta:** Ich, ich meine, d Babett und ich erhebed Aaspruch uf de Hof! Will ich die Ältischt bi ghört er sowieso mir! Also han ich s Rächt dezue! *(mit Nachdruck)* Hett de Mörgeli gseit!

**Babett:** Ich wott aber...

**Berta:** Bis jetz du still und iss!

**Babett:** Jo!

**Lukas:** Hett ächt de Mögeli scho z Mörgeli gha? Ich würd ihn gern ilade!

**Babett:** De git sich nur mit...

**Berta:** *(schnauzt Babett an)* ...Ich rede!

**Babett:** Jo, isch jo scho guet!

**Berta:** De Herr Mörgeli git sich nur mit besserer Gsellschaft ab, hett er gseit!

**Vreni:** Denn isch er für euch wie gmacht!

**Lukas:** Du seisch es! Wahrschiinli hett er es separats Studium gmacht für euch zwee! De Einte zum s Muul uftue und de Andere zum s zue mache!

**Berta:** Mach di nur luschtig! Es vergoht dir denn scho, wenn denn d Grächtigkeit emol an Tag chunnt! Dass du ned imstand bisch de Hof z führe bewiist, dass dir alli Chüe gstohle werded!

**Lukas:** Mir wänd denn luege! Ich bi überzüügt, dass do irgend öpper öppis usheckt gäge mich! Aber d Polizei wird denn das scho usfindig mache!

**Babett:** *(erschrocken)* Du wirsch doch ned d Polizei ufbotte ha! Also nei! Eso es Drama!

**Berta:** Schwieg! Das goht öis nüüt aa!

**Vreni:** Echli komisch, dass d Babett sich so dermasse ufregt!

**Lukas:** Ich hoffe jo nur, dass ihr mit dere Sach nüüt z tue händ!

**Babett:** Nei! Ganz sicher ned!

**Berta:** Schwieg, han i gseit!

**Vreni:** Hesch du gnuieg Vatter? *(räumt, ohne auf die zwei Frauen zu achten, das Geschirr zusammen und verschwindet damit im Haus)*

**Lukas:** Mir isch de Hunger scho lang vergange! *(verschwindet ebenfalls im Haus)*

### 3. Szene

Babett, Berta, David, Lukas

**Babett:** (*scheinheilig*) Hesch du guet gschlofe, Berta?

**Berta:** Nei überhaupt ned! Angscht han i gha! (*dramatisch*) Kei Licht und dunkel säg ich dir! Ich ha im Fall keis bitzeli gseh!

**Babett:** D Nacht isch dänk dunkel, du Babe! Aber jo, Angscht han i au gha, ich bi fascht gstorbe! Isch au guet, dass du a mir zuekläbt bisch, denn hesch mich wenigstens wieder echli beruehigt!

**Berta:** Ich bi doch ned a dir zuekläbt, aber du hesch d Händ immer bi mir äne gha!

**Babett:** Nei, han i ned! Ich bi jo zwee Meter vo dir ewäg gsi won ich gschlofe ha!

**Beide:** (*schauen einander lange entsetzt an und schreien dann aufs Kommando*)  
Aaaaa!

**Berta:** (*steht auf und geht abseits*) Du meinsch...?

**Babett:** (*steht auf und geht auf die andere Seite*) Jo säb mein i! Denn isch das e Frömdiiwirkig gsi! Ich ha au immer öppis ghört raschle!

**Berta:** Ich ebe au! Denn muess jo do no öpper umenand gsi sii!

**Babett:** (*schreit ein weiteres mal*) Aaaaa!... Und jetz fällt mir erscht ii, dass ich jo gar ned uf em WC gsi bi!

**Berta:** Und werum hesch denn das Papier nochezoge? Du hesch sicher emol s Plumsklo bewässeret i de Nacht!

**Babett:** Nei... hä... (*studiert*) Hei, wenn ich s wüsst? Aber denn hett i wahrschiinli Stroh iiklemmt, ned WC Papier! Do muess mer jo mit Stroh de A....

**Berta:** ...Isch scho guet! Eso gnau wämmers ned wüsse!

**Babett:** Also lang halt ich denn das nümme uus! Wenn nur de Mörgeli öppe chämti!

**David:** (*kommt von hinten links*) Wo isch de Lukas?

**Berta:** Guete Morge!

**David:** Jo vo mir uus! Wo isch de Lukas!

**Babett:** Gsehsch jo, dass er ned do isch! Säg emol, hesch du dich i öisem Stall ufghalte die letscht Nacht?

**David:** Nei, han i ned!... Aber ich sött jetz Hilf ha! Do underem Huus udne liit en Maa! Ich glaube es isch de Gigax!

**Berta:** Wirsch jo wohl de Gigax kenne!

**David:** Nei, er hett nüüt gseit! Er isch glaub bewusstlos... und hett ganz en verblüetete Grind!... Ich meine Chopf!

**Lukas:** *(kommt aus dem Haus)* Wer blüetet?

**David:** En Maa wo do unde liit! Muesch cho hälfe, suscht blüetet er no uus!

**Lukas:** Isch er uf öisem Bode oder uf euchem?

**David:** Uf öisem, werum?

**Lukas:** Denn gohts mich nüüt aa!

**David:** Aber ich mag en doch ned ellei träge! Chumm jetz und hilf mir!  
*(nimmt Lukas am Arm und zieht in einfach mit)*

**Babett:** Villecht isch es au de Mörgeli!

**Berta:** Nei de Gigax, hett er gseit!

**Babett:** Aber er isch jo ned sicher gsi! Also, ich gang emol go d Morgetoilette mache! *(ab ins Haus)*

**Berta:** Jo säb mach i grad au! *(ebenfalls ab ins Haus. Kurz darauf ertönt ein lautes Gekreische der beiden im Hintergrund)*

#### 4. Szene

Vreni, Lea, Gret, Lukas, Gigax

**Vreni:** *(kommt mit Lea aus dem Haus)* Um Gottes Wille, mached die jetz es Gschrei wäge es paar Müüs!

**Lea:** I bini zuerst au versrogget ab di Museli! Sine aber sööoni Tierli!

**Vreni:** Mir mache die nüüt! Ich bi mit dene ufgwachse!

**Lea:** *(sieht nach hinten links)* Was magge diese viele Mensche do unte!

**Vreni:** *(schaut ebenfalls)* Das weiss ich au ned! Aber es schiint, dass sie do here chömed!

**Lea:** Isch glaub en Verletzte debii!

**Vreni:** *(schaut Lea sprachlos an)* Siit wenn redsch de du Schwiizerdütsch?

**Lea:** *(schlagfertig)* Io magge snell studiere wie magge spregga in di Berge!  
*(abseits)* Ich meine Montanie oder wie mer seit!

**Gret:** *(und David führen Gigax von hinten links auf die Bühne. Gigax hat den Kopf mit einem Lumpen oder Kleidungsstück verbunden, so, dass sein ganzes Gesicht verummt ist)* Mached bitte Platz, so chan er sitze!

**Lea:** Wär ise diese gaputte Mann!

**Gret:** Ned lang froge! Holed Verbandszüüg!

**Vreni:** Ich muess go luege öb ich öppis finde! *(ab ins Haus)*

**Lukas:** *(kommt von hinten links)* E so nes Gstürm wäge ned meh! Mer chönnt meine es heb Toti gäh!

**Gret:** Wo isch denn jetz de Polizischt Hasefuess?

**Lukas:** De isch no am Spuure sichere! Hett er gseit! Wäge dem bitzeli Chopf hetsch ämel ned müesse d Polizei ufbüüte!

**Gret:** Wenns Verletzti git muess mer immer d Polizei avisiere! Und usserdem isch er jo sowieso uf em Wäg gsi zu dir! Will en du jo geschter Zobe scho ufbote hesch!

**Lukas:** Wenn en ich ufbote ha, denn söll er gfälligscht für mich do sii und ned für de do! *(zeigt auf Gigax)*

**Vreni:** *(kommt mit Verbandszeug aus dem Haus)* Do chönd ihr sälber pflaschtere!

**Gret:** *(nimmt Gigax vorsichtig den Kopfverband weg. Zum Vorschein kommt nur einen kleinen Kratzer)*

**Lea:** Oh, ise das jo de Gigaxeli! Warum du magge schmerzen an di Gopf?

**Vreni:** *(schaut ebenfalls auf die Wunde)* Wägeme sone Chratzerli muess mer ämel ned grad e halbi Armee ufbüüte! *(ab ins Haus)*

**Gret:** Ich ha ned e halbi Armee uf bote! Nur d Polizei! Will ich vome Mord-Aschlag uusgange!

**Lukas:** Wie chunsch jetz du do druf?

**Gret:** Chasch jo luege... *(zeigt auf Wunde)* Er wiist eidüütig Kampfspuure uuf!

**Lukas:** *(zu Gigax)* Was seisch du do dezue? Chasch eigentli nümme rede?

**Gigax:** *(will reden und bewegt aber nur kurz den Mund)*

**Lukas:** De hett jo d Sproch und s Hirni verlore! *(schaut Gigax einen Moment an und geht ab ins Haus)*

## 5. Szene

Lorenz, Lea, Gret

**Lorenz:** *(ist nicht unbedingt ein Strebertyp sondern eher ein Tschooli. Überlegt oft und kratzt sich am Kopf mit dem Spruch „was mache mir jetz“. Kommt in Polizeiuniform von hinten links)* Wo händ er de Verunglückti?

**Lea:** O, Härr Carabinieri, häna ihr dr Hirni une de Snorre gefundet wo hett dr Gigaxeli verlüret?

**Lorenz:** Wär sind sie und was mache sie do?

**Lea:** I magge do Urlaube!

**Lorenz:** *(zu Gret)* Und sie? Wär sind sie?

**Gret:** Ich bi die barmhärzig Samariteri und d Nochpüüri do vom Schattehof!

**Lorenz:** Denn isch de Verletzt uf euchem Hof gfunde worde?

**Gret:** Das isch eso!

**Lorenz:** Was mache mir jetz?... Werum händ sie de Maa ned uf ihre Hof gnoh und händ en do here brocht? Isch das irgendwie e Tarnig?

**Gret:** *(giftig)* Das isch kei Tarnig! Ich ha de Maa gfunde und han en do here brocht, wills nöcher gsi isch! Sie Hasefuess

**Lorenz:** Ich bi kein Hasefuess! Ich heisse Hasefuess!... Haas isch flink, und Fuess?... Isch Fuess!

**Gret:** Jo... und stinkt!

**Lorenz:** Ich dulde kei Beleidigunge! Uf jede Fall bliebed alli do wo jetz do sind! Es wird spöter es Verhör gäh! Und zwar für alli, verstande!

**Lea:** Sisi! I scho magge gapitto!

**Gret:** Nei, das verstohn i ned! Will ich jetz muess hei go s Vieh versorge!

**Lea:** Wo isi eigentlich dr David?

**Lorenz:** Wär isch de David? Wenn i froge dörf?

**Gret:** Das isch min Bueb! De wo zerscht bi de Uufallstell gsi esch! Ich nime aa er isch deheim am schaffe!

**Lorenz:** De isch mir uf Anhieb ned ganz ghüür vorcho! Und jetz isch de eifach abghaue?

**Gret:** Er isch ned abghaue! Er isch go schaffe! Und ich gang ihm jetz go hälfe! Adie! (*will hinten links ab*)

**Lorenz:** Halt! Do bliibe! (*hält Gret fest*) Zerscht muess ich ihre Uswiis gseh!

**Gret:** Ussert de Zunge han i nüüt zum zeige! (*zieht mit zwei Finger die Zunge heraus und spricht mit heraushängender Zunge*) Isch das guet? Chan i go?

**Lorenz:** Los hau ab! Ich chume nochher uf de Hof! Und de David söll au umenand sii! Verstande!

**Gret:** Jo, jo! (*hinten links ab*)

## 6. Szene

Lorenz, Lea, Gigax

**Lorenz:** (*für sich sprechend*) E unkultivierti Person! (*zu Lea*) Möchtet sie de Pazient verarzte?

**Lea:** Ise das niente mina Sagge! Io studiere ische das eine Arbeite fur de Hase... Wie ise diene Name!

**Lorenz:** Hasefuess!

**Lea:** Aa! Jetze io gapitto! Hasefuzeli!

**Lorenz:** Nei! Hasefuess! Fuss mit zwei ss! *(wendet sich an Gigax)*

**Lea:** Aa! Jetza io gapitto! Hasefuess! Hase mit di grosse Ohre! *(geht von hinten auf Lorenz zu und zieht an seinen Ohren)* Sin die aber bizeli piccolo füre eine Hase!

**Lorenz:** *(schiebt Lea auf die Seite)* Es langet! Mir händ do anderi Arbet! Kenned sie de Härr?

**Lea:** Jo io genne so! Ische das di Gigaxeli!

**Lorenz:** Und suscht! Was wüessed sie vo de „Gigaxeli“?

**Lea:** O niente i wisse!

**Lorenz:** Was mache mir jetzt?... *(zu Gigax)* Also zeiged sie emol das Malör! *(tastet den Kopf ab und fängt an zu verbinden)* Tuets weh?

**Gigax:** *(gibt keine Antwort und starrt nur gerade aus)*

**Lorenz:** Chasch ned rede?

**Gigax:** *(gibt keine Antwort)*

**Lorenz:** Was isch denn passiert do unde?.... So gib doch Antwort! *(schüttelt ihn)*

**Lea:** Hette er glaube fest aaschlaget sini Gopf!

**Lorenz:** *(ist inzwischen fertig mit verbinden. Der Verband darf übertrieben gross sein und muss auch nicht gut aussehen)* Emol luege öb er en Uswiis im Sack hett! *(tastet Gigax ab und findet in der Innentasche einen Ausweis)* Do hett er öppis! Denn hämmer wenigstens die richtige Personalie!

## 7. Szene

Berta, Babett, Lorenz, Lea

**Berta:** *(und Babett kommen aus dem Haus. Sind etwas besser gekämmt, tragen aber immer noch die gleichen Kleider. Schauen der Szene erst nur von der Türe her zu. Gigax muss so sitzen, dass er von den zwei Frauen nicht erkannt wird)*

**Lorenz:** *(liest den Ausweis)* De heisst jo gar ned Gigax!

**Lea:** Wie heisse dann diese Mann?